

## Feirmeoirí Mairteola

**Ceist 1** Beidh tú ag féachaint ar ball ar thuairisc faoi fheirmeoirí mairteola. Sula bhféachann tú ar an tuairisc áfach, an féidir leat na focail seo a cheangal le chéile?

|                            |                            |
|----------------------------|----------------------------|
| 1. In a dilemma            | a. faoi chaibidil          |
| 2. big demand              | b. meáchan                 |
| 3. being discussed         | c. seantaithí              |
| 4. new genomics initiative | d. bunachar sonraí         |
| 5. beasts/ cattle          | e. i gcruachás             |
| 6. database                | f. brabús                  |
| 7. weight                  | g. togra nua géanómaíochta |
| 8. profit                  | h. beithígh                |
| 9. feeding                 | i. éileamh an mhargaidh    |
| 10. past experience        | j. ag beathú               |
| 11. market demand          | k. éileamh mór             |

|   |   |   |   |   |   |   |   |   |    |    |
|---|---|---|---|---|---|---|---|---|----|----|
| 1 | 2 | 3 | 4 | 5 | 6 | 7 | 8 | 9 | 10 | 11 |
|   |   |   |   |   |   |   |   |   |    |    |

**Ceist 2** Tabhair buille faoi thuairim faoi ábhar na tuairisce sula bhféachann tú ar an mír. Ansin, féach ar an mír den chéad uair le fáil amach an raibh an ceart agat.

**Ceist 3** Féach ar an tuairisc arís. An bhfuil na habairtí seo fíor nó bréagach?

1. Tá éileamh mór ag monarchana ar mhairteoil ó thairbh sa lá atá inniu ann.
2. Sheol an tAire Coveney togra nua géanómaíochta i gCorcaigh inniu.
3. Déanfar tástáil ar eallach mairteola chun bunachar sonraí a bhailiú.
4. Beidh na feirmeoirí féin in ann a mbeithígh féin a chur i gcomparáid le beithígh ar fud na tíre.
5. Níl na monarchana ag iarraidh tairbh faoi bhun sé mhí dhéag d'aois a cheannach.
6. Ní athraíonn margadh na mairteola tapa go leor.
7. Beidh feirmeoirí in ann an brabús is fearr a dhéanamh as gach ainmhí atá acu, le cuidiú ón gcóras nua géiniteach.

**Ceist 4** ‘...sé mhí dhéag...’

- A.** Cén fáth a bhfuil séimhiú ar an bhfocal **déag**?  
**B.** Cuir Gaeilge ar na huimhreacha seo a leanas:

- 15 days
- 12 sticks
- 11 tables
- 17 computers
- 19 books
- 13 boxes
- 14 folders

**Ceist 5** ‘...a bhailiú...’ ‘...a sheoladh...’ ‘...a chur...’

Samplaí den ainm briathartha atá sna samplaí thuas. Líon na bearnaí sna habairtí seo a leanas leis an bhfoirm cheart den bhriathar.

1. Caithfidh mé an obair sin \_\_\_\_\_ (déan).
2. An féidir leat an madra sin \_\_\_\_\_ (cuir) amach, le do thoil?
3. Ní miste liom aistí móra \_\_\_\_\_ (scríobh).
4. Is mór an trua go gcaithfidh muid an leabhar amaideach sin \_\_\_\_\_ (léigh).
5. Bhí orm an bia ar fad a bhí sa reoiteoir \_\_\_\_\_ (caith) amach, mar bhí sé as dáta.
6. Ba bhreá liom an gúna sin \_\_\_\_\_ (ceannaigh) ach níl an t-airgead agam.
7. Ní maith liom \_\_\_\_\_ (abair), ach ní oireann na bristí sin duit.
8. An bhféadfá an doras \_\_\_\_\_ (dún)? Tá mé ciaptha ag an bhfuacht.

**Ceist 6** Pléigh na ceisteanna seo le do ghrúpa:

1. An feoilséantóir tú? Cén fáth?
2. Ar ith tú feoil chapail riamh? An bhfuil tú cinnte?
3. Cad a cheapann tú faoin dianfheirmeoireacht ?

Treoracha agus Freagraí

Ceist 1

|   |   |   |   |   |   |   |   |   |    |    |
|---|---|---|---|---|---|---|---|---|----|----|
| 1 | 2 | 3 | 4 | 5 | 6 | 7 | 8 | 9 | 10 | 11 |
| e | k | a | g | h | d | b | f | j | c  | i  |

Ceist 2

Abair le gach beirt plé a dhéanamh faoi ábhar na míre, sula seinntear í.

Ceist 3

1. Tá éileamh mór ag monarchana ar mhairteoil ó thairbh sa lá atá inniu ann. **Bréagach**
2. Sheol an tAire Coveney togra nua géanómaíochta i gCorcaigh inniu. **Fíor**
3. Déanfar tástáil ar eallach mairteola chun bunachar sonraí a bhailiú. **Fíor**
4. Beidh na feirmeoirí féin in ann a mbeithígh féin a chur i gcomparáid le beithígh ar fud na tíre. **Fíor**
5. Níl na monarchana ag iarraidh tairbh faoi bhun sé mhí dhéag d'aois a cheannach. **Bréagach**
6. Ní athraíonn margadh na mairteola tapa go leor. **Bréagach**
7. Beidh feirmeoirí in ann an brabús is fearr a dhéanamh as gach ainmhí atá acu, le cuidiú ón gcóras nua géiniteach. **Fíor**

Ceist 4

A.

Cuirtear séimhiú ar **déag** tar éis ainmfhocal a chríochnaíonn le guta (ach amháin más ainmfhocal neamhrialta, ar nós *bliain, uair* nó *seachtain* atá i gceist.)

B.

- 15 days – cúig lá dhéag
- 12 sticks – dhá bhata dhéag
- 11 tables – aon bhord déag **nó** aon tábla dhéag
- 17 computers – seacht ríomhaire dhéag
- 19 books – naoi leabhar déag
- 13 boxes – trí bhosca dhéag

Ceist 5

1. Caithfidh mé an obair sin **a dhéanamh**.
2. An féidir leat an madra sin **a chur** amach, le do thoil?
3. Ní miste liom aistí móra **a scríobh**.
4. Is mór an trua go gcaithfidh muid an leabhar amaideach sin **a léamh**.
5. Bhí orm an bia ar fad a bhí sa reoiteoir **a chaitheamh** amach mar bhí sé as dáta.
6. Ba bhreá liom an gúna sin **a cheannach**, ach níl an t-airgead agam.
7. Ní maith liom **a rá** ach ní oireann na bristí sin duit.
8. An bhféadfá an doras **a dhúnadh**? Tá mé ciaptha ag an bhfuacht.

Ceist 6

Is féidir na foghlaimeoirí a chur ag plé na gceisteanna seo i mbeirteanna nó i ngrúpaí de thriúr nó de cheathrar.

**Eimear Ní Chonaola**

Tá na céadta feirmeoir mairteola, ar fud na tíre, i gcruachás faoi láthair mar gheall ar an laghad éilimh atá ar fheoil tairbh, feoil a raibh éileamh mór ag monarchana uirthi<sup>1</sup> go dtí le gairid. In iarthar Chorcaí ar maidin, gné eile den fheirmeoireacht mhairteola a bhí faoi chaibidil.

**Grett O'Connor**

Bhí an tAire Talmhaíochta, Simon Coveney, i nDroichead na Bandan ar maidin chun an togra nua géanómaíochta mairteola a sheoladh go hoifigiúil. Déanfar tástáil ar shamplaí ó bheithigh mairteola chun bunachar sonraí a bhailiú. Tabharfar na torthaí ar ais do na feirmeoirí. Is féidir leo a dtréad féin a chur i gcomparáid leis an meán náisiúnta, ó thaobh meáchain de agus ó thaobh go leor tréithe eile freisin.

**John McCarthy, Eolaí, ICBF**

Is é seo an chéad tír ar domhan an obair seo a dhéanamh. Agus an obair seo, cuireann sé breis eolais i lámh an fheirmeora. Agus leis an eolas seo beidh an feirmeoir in ann rogha níos fearr a dhéanamh agus i ndeireadh an lae breis airgid a chur ina phóca féin.

**Grett O'Connor**

Ach is beag sceitimíní atá ar fheirmeoirí mairteola, Bertie O'Mahony agus John Lordon, ó Chill Bhriotáin. Ghlacadar le comhairle na saineolaithe dhá bhliain ó shin go mbeadh brabús maith le déanamh as tairbh a thógáil dá gcuid feola. Anois, tairbh faoi bhun aois a sé mhí dhéag amháin atá ag teastáil ó na monarchana. Tá Bertie agus John i measc na gcéadta ar fud na tíre atá fágtha le sé seachtaine anuas, ag beathú tarbh ba chóir a bheith díolta acu fadó. Tá seantaithí ag feirmeoirí ar a bheith á gcur féin in oiriúint d'éileamh an mhargaidh. Léiríonn cruachás na bhfeirmeoirí mairteola maidir lena gcuid tarbh cé chomh tapa is a athraíonn an margadh sin. Anois le cabhair an chórais nua ghéinitigh atá seolta inniu, ar a laghad beidh feirmeoirí in ann an brabús is mó gur féidir a dhéanamh as gach ainmhí faoina gcúram. Grett O'Connor, Nuacht TG4, i gCill Bhriotáin, i gContae Chorcaí.

---

<sup>1</sup> air a deirtear